

prævisam Christi mortem jam peccasset Adam, & ipso omnes ejus posteri ( nam Christus fuit decretus ut passibilis ob deletionem originalis prævisi ) non potuit ordinari, ne peccaret Virgo in Adam, sed tantum ne in tempore peccatum transfunderetur in ipsam.

II. Probatur. Si non esset vera nostra Conclusio, ideo esset, quia stante ipsa, honor Virginis diminueretur; sed hoc est falsum: ergo nostra Conclusio est vera. Probatur minor. Augustinus docet lib. 6. contra Julianum: *Peccatum originale, quatenus consideratur in actione alterius, alienum est; fit autem proprium tantum contagione propagationis; id est, per contractionem actualem; sed honor Virginis diminuitur tantum per peccatum proprium non per alienum: ergo non diminuitur honor Virginis, si dicitur, Virginem habuisse debitum contrahendi originalis peccati, quia in hoc casu peccatum est alienum; minueretur tamen, si diceretur contraxisse ipsum contagione propagationis, seu per contractionem actualem, quia tunc fuisset proprium.*

III. Probatur. Si Virgo non habuisset debitum contrahendi originalis, Christus non fuisset ipse Redemptor, nisi fingendo decreta suspensiva, quæ in Deo admitti non possunt; sed hoc idem esset, ac augere honorem matris, & minuere honorem Filii, quod non est dicendum: ergo &c.

IV. Probatur. Sanctus Zozimus Papa apud Augustinum epist. 157. docet: *Nullus, nisi qui peccati servus est, liber efficitur; nec redemptus dici potest, nisi qui vere per peccatum fuerit ante captivus.* Quæ verba Adversarii contra nos adducunt, ut probent, B. Virginem fuisse cum labe originalis culpæ conceptam. At nos respondemus, distinguendo propositionem illam: Nullus potest dici redemptus, nisi qui fuerit per peccatum ante captivus, debito, concedimus; ipsa tantum, negamus. Unde patet, quod ad debitum necessario aliquando recurrendum est, ut nostram principalem sententiam tueamur. Quod fatetur Frassen ex Scoto in 3. dist. 3. qu. 1. num. 14. „ Omnes quotquot objici

„ possunt Sanctorum autoritates, nihil aliud significare, quam quod B. Virgo „ via seminali ab Adamo propagata, habebat debitum contrahendi peccatum originale, & ex vi suæ Conceptionis illud contraxisset, nisi speciali Dei privilegio ejus anima, eodem instanti, quo formata fuit, gratia sanctificante fuisset illustra-

„ ta „. Et post pauca: „ Etenim proprie „ quis aliquem dicitur redimere a captivitate, & carcere, dum eum jam propter debita detrudendum in carcerem, pro eo satisfacit creditori, & ejus debitum exolvit: at B. Virgo, ut expresse docet Doctor, habebat debitum contrahendi captivitatem peccati originalis; & illud vi suæ Conceptionis, ac propagationis ab Adamo via seminali contraxisset, nisi divinitus fuisset præservata. Hinc est quod illa præservatio vere & proprie dici possit redemptio: secus autem est de Angelis, qui nullum in se habebant debitum incurrendi lapsus, nisi prævenirentur; unde illorum præservatio non ita proprie vocari potest redemptio, ac præservatio B. Virginis „.

Dicimus III. Ecclesiam in ordine ad B. Virginis Mariæ Conceptionem, tum in scribendo, tum in loquendo, hæc observanda præscribere; quæ referuntur a Cardinali Laurentio Brancato de Laurea in sua Epitome Canonum omnium, verbo: *Conceptio B. Mariæ Virginis.*

Primo. Conceptionem B. Mariæ sine peccato originali defendentes, si dicunt, aut prædicant, quod Authores, vel alii defendentes oppositum, sunt hæretici, vel peccant mortaliter, incurrunt excommunicationem reservatam Papæ. Et è contra: qui tenent fuisse conceptam cum originali, si dicunt, esse hæreticos, vel peccare mortaliter, qui tenent oppositam, incurrunt excommunicationem, Papæ pariter reservatam. Sixtus IV. in Extravag. de Reliquiis, & veneratione Sanctorum cap. Grave nimis, & Concilium Tridentinum sess. 5. in decreto de peccato originali hæc habet: *Declarat hæc ipsa Sancta Synodus non esse sua intentionis comprehendere in hoc decreto, ubi de peccato originali agitur, B. Immaculatam Virginem Mariam, Dei Genitricem, sed observandas esse constitutiones felicitis recordationis Sixti Papæ IV., sub pœnis in eis Constitutionibus contentis, quas innovat,*

Secundo. De Conceptione B. Mariæ, sine vel cum originali facta, disputari non potest publice. Pius V. Constitut. 114. quæ incipit: *Super speculam.* Neque scribi, aut dici vulgari sermone. Idem Pius V. citata Constitut., & neutra sententia dicenda est erronea; & pœnas statutas tam Clericis, quam Laicis contravenientibus idem Pius V. in eadem Constitutione edidit. Hæc omnia confirmantur a Paulo V. Constitut. 97. quæ incipit: *Regis*